

薩曇分陀利經

失譯人名



南無本師釋迦牟尼佛

自歸於佛 當願眾生 紹隆佛種 發無上意
自歸於法 當願眾生 深入經藏 智慧如海
自歸於僧 當願眾生 統理大眾 一切無礙

薩曇分陀利經

聞如是：佛在羅閱祇耆闍崛山中。

與大比丘眾四萬二千人俱。

三慢陀毖陀、文殊師利菩薩等，八萬四千人。

彌勒菩薩等，拔陀劫中千人。

釋王等與忉利諸天，不可復計。

梵王與諸梵，不可復計。

阿闍世王，與閻浮提人王，眾多不可復計。

佛在四輩弟子，比丘、比丘尼、優婆塞、優婆夷中，說《薩曇分陀利》¹，佛說無央數偈。

是時，七寶浮圖，踊從地出，上至梵天。浮圖中央，有七寶大講堂，懸幢幡花蓋，名香，清潔。殊好講堂，中有金床，床上有坐佛，字抱休羅蘭²，歎釋迦文佛。

言：善哉！善哉！我般泥洹已來，過恆邊沙劫、恆邊沙佛剎，止於空中。恆邊沙佛以過去，我歷爾所劫，初不還彼剎。我見釋迦文佛精進求佛道，用人民故，布施無厭足，不惜手、不惜眼、不惜頭、不惜妻子象馬車乘、不惜珍寶，無有貪愛心。我故來出，欲供養釋迦文佛，并度諸下劣。願釋迦文佛，坐我金床，更說《薩曇分陀利經》。

於是，釋迦文佛上講堂，就於金床而坐。便說《薩曇分陀利經》，復說無央數偈言：

聞樂寶佛 知名字者 不畏生死 不復勤苦
聞藥王佛 知字名者 可得愈病 自識宿命

於是釋迦文佛說：無央數阿僧祇劫，復說無央數阿僧祇劫，我行菩薩道時，求索《薩曇分陀利經》。布施與人，在所求索飯食衣被、七寶妻子，初無愛戀心。

我為有國王時，是世極長壽，我便立太子為王，棄國事，搥鼓搖鈴，自銜身

1 漢言法花。
2 漢言大寶。

言：「誰欲持我作奴者？我求索《薩曇分陀利經》，我欲行供養。」

時，有一婆羅門語我言：「與我作奴來，我有《薩曇分陀利經》。」

我便隨婆羅門去，一心作奴，汲水、掃地、採花果，飲食婆羅門，千歲不懈息。

佛於是說偈言：

撾鼓搖鈴願 自銜言誰欲 持我作奴者 我欲行供養 奴心善意行

佛言：是時王者，我身是也。時婆羅門者，調達是。

誰恩令我得滿六波羅蜜者、三十二相八十種好？皆是調達福恩。

調達是我善師，善師恩令我得滿六波羅蜜、三十二相八十種好，威神尊貴，度脫十方，一切皆是調達恩。

調達，却後阿僧祇劫，當得作佛，號名提和羅耶³，當得十種力，三十二相八十種好。天王佛國，名提和越⁴。天王佛當為人民說法，盡劫不懈止。第一說法，當度恆邊沙人得羅漢道，恆邊沙人得辟支佛道，恆邊沙人發阿耨多羅三藐三菩提心。

爾時，天王佛壽二十劫，乃至般泥洹後，法住二十劫。天王佛般泥洹後，不散舍利，起作一七寶塔，廣六十里、長八十里，一切閻浮人悉往供養佛舍利。

是時，無央數人得羅漢道，無央數人發辟支佛心，無央數人發阿耨多羅三藐三菩提心。

善男子善女人，聞是法花之經，信不誹謗，除滅過去當來罪，閉三惡道門，開三善道門，生天上常第一，生人中常第一，生十方佛前，自然七寶蓮花中化生。

於是，下方佛所從菩薩，名般若拘，自白其佛：早還本土。

釋迦文佛謂般若拘：我有菩薩，字文殊師利，可與相見，乃還本土。

即時，文殊師利，從沙曷龍王池中涌出，坐大蓮花，花如車輪，其花千葉，從諸菩薩其數甚多。

文殊師利下大蓮花，為二佛作禮，還與般若拘菩薩相問訊。

般若拘問文殊：所入池中，度云何數多少？

文殊答曰：其數甚多，無能計者。若當口說，非心所信，自當有證。

其池即時涌花從下而出，盡是池中一切所散。

本發菩薩心者，其花在空中但說摩訶衍事。

³ 漢言天王佛。

⁴ 漢言天地國。

本發聲聞者，其花在空中但說斷生死事。

文殊師利見花如是，以偈答般若拘菩薩言：以仁者之意，自分別其數。

般若拘菩薩復問文殊師利：說何等法，所度乃爾？

文殊答曰：於是池中，但說《薩曇分陀利》。

般若拘復問：其法甚尊，無能及者，爲有便可得佛者不？

文殊答曰：沙曷龍王，有女年八歲，智慧甚大，意願不輕，便可得佛。

般若拘菩薩謂文殊師利言：我見仁者之師，求佛勤苦，積累功德劫數甚多，不信此女便可得佛。

池中有女，卽時涌出，遶佛三匝，叉手而白佛言：佛相好端正，功德巍巍，爲諸天所奉，爲一切龍鬼神人民薩和薩所敬，所說法甚尊。今我立願，便欲得佛。

舍利弗卽謂女：雖發是願，佛不可得。又，汝女行積功累行，未應菩薩。

女自持一摩尼珠，其價當一大國，女疾過與佛，佛亦疾受。女謂舍利弗及般若拘菩薩：我與佛珠，爲遲疾？

答曰：甚疾！

女復言：佛受我珠，爲遲疾？

答曰：甚疾！

女言：我與佛珠爲遲，佛受我珠復遲，我今取佛疾。

於是，卽時女身變爲菩薩，眾會皆驚。卽變爲佛身，相種好皆具足。國土、弟子，如佛所爲。

一切眾會，天、龍、鬼神、無央數人皆發無上正真道意。三千大千國土，六反震動。三萬須陀洹，得阿惟越致。

薩曇分陀利經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



香港新界屯門藍地青山公路18號妙法寺 <https://www.mfbm.hk>
18 Castle Peak Road, Lam Tei, Tuen Mun, N.T., Hong Kong